



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

US-i amak nungbo telangzüba tesashi agütsütsü: Ayatollah Ali Khamenei

Jakub Mensik-i Miami Open final nung Djokovic akok



VOL. XXII ISSUE NO. 167 (ADOK 167)

DIMAPUR

SANGTENNÜ TUESDAY

RONGCHII (APRIL) 01, 2025

₹ 5.00

AKM-i Tuli Paper Mill lapokshiba pelaa agizüker

Dimapur, March 31, 2025

(TYO): 3A Capital Services Ltd kübok Nagaland Pulp & Paper Corporation Limited (NPPCL) asentenshia lapoktsü inyakba pusema nungiter ta Ao Kaketshir Mungdang (AKM)-i metetdaksüogo.

Mokokchung district nung alirtemi mapang talangka nungi industry asentenshia lapoktsü aser rongsenketzüing ajungkettsü aginüa aruba iba inyakyim ajanga tongtsüogo, ta AKM-isa ashi.

"Nagaland chief minister Neiphiu Rio-i iba tesem nung industry renlokdahtsütsü inyakba nung onokia pusema nungiter" ta AKM Tir Lanutoshi Aier aser Tongti Tezülur Satemmongba nati sangdong ka nung ashi.

March 12, 2025 nü CM Rio-i Tuli semdangdang 3A Capital Services Led den yaritepa NPPCL maparen tenzüksü sorkari inyakba nenshia

metetdakja liasü.

"Pai mangdang tulu yur lenisüba ajanga iba mill asentenshia lapoktsü pungmang asangsang nung atalokogo" ta AKM-isa ashi.

Iba mapatong takok ngua inyaksü atema tenük yoktsüla aser Nagaland sorkari Mokokchung district aser tanga tesemtem nung NPPCL ali kümzüka ayutsüla ta AKM-isa ashi.

"Iba mill asentenshia lapoktsü atema NPCCL ali atsünga magidaktsütsüla. NPPCL lapokshitsü atema inyakba nung nübortem aser sendaktepa alirtemi pusema nungittsü mepishir" ta AKM-isa ashi.

Iba mill lapokba ajanga Mokokchung aser Nagaland ajangzüksü anungji mapatong takok ngua inyaksü atema onoki state sorkar den amalitepa yariteptsü, ta AKM-isa ashi.

Foothills Road nung joint inspections senzütsü

Dimapur, March 31, 2025

(TYO): NFHRCC den külemi bangdak Department aser kin hohotemi tang tashi mashii mapang ka nung Foothills Road yangluba semdangtsü.

Iba joint inspections atema contractor temi pei pei mapa lezmüka inyakdak renema alitsü metetdaksür ta tanü Media Cell, NFHRCC-i sangdong ka nung ashi.

Foothills Road yangluba ya nübortem mapatong ka lir anungji shinga tsütsü tejak meshii dang

DPR specifications nung aliba ama inspections asütsü, ta parnoki ashi.

Contractor kari tesem kar nung DPR nung aliba ama mesüi substandard materials amshiba putetogo ta NFHRCC-isa metetdaksü.

NFHRCC-i anir joint inspections senzüdang divisions balala nung kin hohotem aser local CSOs-i amalitepa yariteptsü mepishir ta Media Cell sangdong nungsa shia lir.

Dimapur nung Muslim nungeri Eid al-Fitr amung



Dimapur, March 31, 2025 (TYO):

Dimapur nung Muslim nungertemi Hombamü Eid al-Fitr benjung tulu ayongzüka mungogo.

Ita ka piyong lumia aruba sülen tanü Golaghat road anasa Idgah prayer ground nung parnok adenshia benjung amung.

Iba sentong nung Maulana F Ahmed-i Eid Fitr sarasadem ketdangsüa ashi aser Muslim nunger meyrjang aika adenshia

shilem agia liasü.

Maneni, Diphupar aser Chümoukedima nunga Muslim nungertemi Masjid nung Eid al-Fitr mungogo.

Muslim Council Dimapur-i nisung ajak dangi Eid Mubarak salem aben aser Nagaland nung alirtemi Eid mapang dang masü saka nüngdakba mapang ajak nung parnok den yaritepba atema pelaba metetdaksü.

Kiphire aser Meluri arrtsülen raratepdang nisung 4 yiru



Deputy Chief Minister Y. Patton-i March 31, 2025 nü Naga Hospital Authority Kohima nung anepalurtem semdangdang agiba noksa ka angur.

Kohima, March 31, 2025

(TYO): Nagaland kübok Kiphire aser Meluri district tem nung arrtsülen tensa mejungi küma lir aser iba ya yimtsüing kar tsüingda mangatettep adoka raraba ajanga adok.

Iba tatalokba nung nisung pezü shi yirua aliba osang angazüker.

"Kiphire aser Meluri district tem nung ozüing alema inyaksangshiba osang angashia temulung raksar. Ibala tatalokba ajanga yimjung raksatsüba dang masü saka kin balala tsüingda tesentaktep mejungi kümdaktsür" ta Deputy Chief

Minister Y. Patton-i ashi.

Iba lendong nung nisung asem terara yirua anepaluogo saka ka tekolak yiruba sülen mozü kidang anioka lir, ta Y. Patton-i Naga Hospital Authority Kohima kima nung osangbener den jembidang ashi.

"Iba lendong atalokba atema sasar saka Tsüngrem taochi ajanga yirua alisang tajungba lir ta doctor-i shiogo" ta paisa ashi.

"Onoki Kiphire aser Meluri nung Deputy Commissioner tem dang bushisüingdang asütsü aser Commissioner Nagaland ajanga state sorkar nem osang agütsütsü mapa lezmüksüogo" ta

Deputy CM-isa ashi.

"Tensa süngjemogo saka telok ajaki putepa alitsüsa aremzüksü mepishir. Mangatettep atema olemteptsüla aser angatetteptsüla" ta Patton-isa ashi.

Tanü Deputy CM Patton den Fire & Emergency Service, Home Guards & Civil Defence Advisor S. Kiusumew Yimkhiung, New & Renewable Energy, NSDMA Advisor Z Nyusietho Nyuthe, DGP Nagaland Rupin Sharma, Home Commissioner Vyasan R, aser Meluri DC Mhathung Tsanglao nungeri yirua alirtem semdanga liasü.

Biren Singh-i asür PA Sangma tenüing amshiba sasar: Conrad

Shillong, March 31, 2025

(Agencies): Taoba Manipur Chief Minister N Biren Singh-i PA Sangma aitsüba atema Meghalaya Chief Minister Conrad Sangma-i o meyiptsüogo.

"Biren Singh-i kübo asür P.A. Sangma tenüing amshiba atema sasaa bilemer. Küboi teti North East nunger atema noktaka aru aser North East nung tebilemtsü aser nübortem temetentem atema

jembia aru" ta Conrad-i ashi.

Biren Singh-i Conrad dang Manipur nung security inyakyim meteta lir asü ta asüingdangba den asür PA Sangma-i kin nung ajemdaker Northeast lemsatsü atema inyakogo ta metetdaksü.

Tang ya yimtenren tsütsü mangatettep indang jembitsüba masü saka Manipur nung tebilemtsü ajurua aliba koktetsü atema amalitepa inyaksüba mapang ka lir ta Conrad-i ashi.

"Tang mapang nisung ajaki Manipur nung yimjung aser putepa alitsüsa tensa ka bener arutsü atema inyaksüla. Tang ya yimtenren tsütsü tajangzü angutsü atema meinyaksüla. Asenok ajak külemi yariteptsüla" ta paisa ashi.

"Nisung ajaki Manipur nung alirtem ajungtsü atema inyaksüla aser asür P.A. Sangma-ia iba ama ang aginüa inyakla" ta Conrad-isa ashi.

Bangladesh-i China dang NE India nung "Extension" asütsü ayongzüker

New Delhi, March 31, 2025

(Agencies): Bangladesh interim government adviser Muhammad Yunus-i India amokmerena China dang Northeast India nung maparen ulushitsü shiogo.

Yunus-i taoba hopta anogo pezünü atema China semdanga liasü aser idangji pai China dang Northeast India nung "seven sister states" ya anüolen tsütsü Bangladesh-i meketbanga lir ta ashi.

Muhammad Yunus Bangladesh-i meyipa aruba sülen iba indang video ka social media nung prokshiba ajanga osang meteta aküm.

Yunus-i China dang Bangladesh nung tesepe ka amenoker Northeast India nung "extend" asütsü ashiba video nung lir.

"India nung state 7 dang seven sister states ta ajar aser ali agi meketbanga lir. Parnoki tzüyim atongtsü tamakoktsü. Northeast India ajunga atema guardian ji onok (Bangladesh) dang lir" ta Yunus-isa ashi.

"Anungji iba ajanga China atema takoktsü lenmang lapoktsür. Iba ya Chinese economy awaloka aoba asütsü akok. Kechisarena yangluang, itemji

shishilembang, China-i meyipa bener oang mesüra alima dangi export süang" ta paisa China sorkar dang ashi.

PM Modi economic advisory council nung züngsem Sanjeev Sanyal-i social media nung iba video lemsatep.

"India nung state 7 ya ali agi meketbanga lir ta shia Yunus-i China nunger yimjak nung mesüzüker. China-i Bangladesh nung arua shishilembatsü pelashishia agizüker saka kechiba India state 7 ali agi meketbanga aliba indang jembir?" ta Sanjeev Sanyal-i asüingdangogo.

International University Dimapur nung Central Library semzükogo



Dimapur, Metsüremi/March 31 (TYO): Nagaland Angh La Ganesan-i March 31, 2025 nü International University, Dimapur (taoba mapang The Global Open University, Nagaland ta jaa liasü) nung Dr. Keshav Baliram Hedgewar Central Library semzüksüogo. Dr. Keshav Baliram Hedgewar asoba anogomung 136 buba nung iba kaketnang ya semzük.

Iba sentong nung jembidang Angh-i 'intellectual curiosity' adokdaksütsü aser takum tepiyong angazüksü asoshi library ya kanga tongtipang lir ta ashi.

Central Library amenokba ya Dr. Hedgewar mapa asoshi akhum agütsüba tajung ka lir ta ashi aser Hedgewar ya India sobaliba aser nationalist asendenshiba nung tejangja nübu ka liasü, ta ashi.

"Nüngdakba peria aliba

kaketnang ya angazükdak tesep ka ama lir, kaketshir aser scholar tem puti otsü, philosophy, science aser humanities tali tejangjaba nung angatetsü asoshi ajungmesor," ta Angh-i ashi.

Kaketshir aser researchers temi nüngdakba peritsütsü asoshi Central Library nung digital learning tools, online resources aser modern technology meyoktepa nung tajangzük jenti lir, ta pai ashi.

Pai kaketshirtem dang iba kaketnang ya academic excellence atema kisüng masü saka tekolok shisatsü aser kija shia aintsü atema amshia linük yangerba nung shilem agitsü ayongzüka liasü.

Iba mera asoshi International University, Dimapur nem tenüngsang agütsü aser ano iba university indang Founder and Promoter, Dr. Priyaranjan Trivedi nem alakteta tenüngsang agüja liasü, shibai

RSS indang nükjidong, takok indang kaket English aser Hindi nung zülua liasü.

Pai tesayur, kaketshir aser administration dang parnoki iba Central Library mangdang asangsang kumdaksütsü asoshi bendanga agütsür inyakba tushia liasü.

"Asenoki iba kaketnang Dr. Keshav Baliram Hedgewar tenüng nung semzüksüadang shisatsü, linük telungjem aser intellectual excellence atema milen ka ama südaktsüti," ta Nagaland Angh-i ashi.

Iba sentong nung Pro Chancellor, Dr. Utkarsh Sharma, Founder Chancellor, Dr. Priyaranjan Trivedi, Chancellor, Dr. Shyam Narayan Pandey aser Vice Chancellor, Dr. Subhram Rajkhwa nungeria o tatsütsü jembi aser Registrar, International University ajanga melepzüng o jembia sentong tembang.

Angh Ganesan-i Aoaleang aser Monyu benjong salem lemsatep

Dimapur, Metsüremi/March 31 (TYO): Nagaland nung aliba Konyak kin dangi Aoaleang benjong salem abener, ta Nagaland Angh La Ganesan-i sangdong ka ajanga ashi.

Iba benjongmung ajanga tepela, telungjem aser temoatsü talubosa bener arujang ta moatsür. Mongpu tasen aruba asenoki benjongdang asenoki tesunep, yimchi-yimjung aser sobaliba senbang tepela agi agizükti, ta ashi.

Iba benjong tanüla ajanga asenok tesendaktep akangshitsü aser tesendaktep aser takoba nung aotsü imlar, ta Angh La Ganesan-isa ashi.

Ano Nagaland Angh La Ganesan-i sangdong ka nung Phom nunger adianu aser adianutsürtem dangi Monyu benjong salem abener, ta ashi.

Iba benjong ajanga tepela, yimchiyimjung aser temang anema aliba temoatsü bener arujang ta moatsür.

Asenoki asendenshi aser tepela tanüla benjongdang angatettepa alitsü, tesendaktep tashi itshitsü angazükti aser asen sobaliba tajung tushia amshiti, ta Angh Ganesan-i ashi.

Temoatsü aser yimchiyimjung Monyu benjong ka südakjang ta moatsü, ta paisa ashi.

NSCN/GPRN ajanga asükhu lemsateper

Dimapur, Metsüremi/March 31 (TYO): NSCN/GPRN-R (Akato) indang MIP sangdong ka ajanga, Tatar aser PA to Ato Kilonser NSCN/GPRN, Aaron Zhimo asükhu lemsatepa liasü.

Aaron ya Thahekhu Village nung alir ka liasü aser pa March 30, 2025 nü Dimapur Civil Hospital nung asü.

Asür Aaron-i linük tenzüka asoshi NSCN-i pelashishia

agizüker aser pa mapa tajung Naga National Movement indang kaket tem nung teti alitsü.

Asür tanüla teti tatem maka tesunep nung anisüngzükjang ta Tsüngrem taochi meshitsür aser par kinunger aser medemer tem mulungjang nung tesuneptsüba agüjang ta sarasademtsür, ta NSCN/GPRN sangdong ajanga ashi.

Dimapur nung Dr. Lal PathLabs semzükogo



Dimapur yimti kübok Notun Bosti nung March 31, 2025 nü Dr. Lal PathLabs semzükdang tangokba noksa nung angur.

Dimapur, Metsüremi/March 31 (TYO): Dr. Lal PathLabs ta sür Nuton Bosti nung Tajen Ao road anasa HT Square nung pathology lab ka Hombarnü semzükogo.

Iba laboratory semzüksüba sentong nung jembidang, Dr. Lal PathLabs yagi takok tulu ngua laboratory ka aliba nungi tangbo linük tesem balala nung 300 dak tema lir, ta Advisor to Chief Minister, Nagaland Dr Chumben Murry-i ashi.

Nagaland-i world-class laboratory facilities bener aruba atema pai pelaba lemsatep aser healthcare facilities tsütsü Nagaland tarutsü jenjang junga lir, ta ashi.

Tanübo Lal PathLabs ya pathology service agütsür tajungtem rongnung ka lir aser ibai Assam, Shillong, Aizawl,

Agartala aser tang Dimapur nung lir, ta Chief Executive Officer, Dr. Lal PathLabs, Shanka Banerjee-i ashi.

Northeast nunga onok tali akumer aser akok tashi nüburtem anasai oa service agütsütsü imlar, ta pai ashi.

Chief of Lab, ENR Health Nagaland Dr. Neiphreno Sale Odyuo-i sentong nung jembidang, ibai mapang talangka nungi aginüa aliba asangsang akumba anogo ka lir, ta ashi.

Kü mangdangji Nagaland nung aliba nüburtem nem quality diagnostic temelaba aser tayongba nung agütsütsü lir, ta pai ashi.

Dr. Lal PathLabs nung küm aika inyaka arur asünung yangi alir temi tajungtiba nung nübur yaritsü mangdang lir, ta lai ashi.

NSCN/GPRN (Niki) ajanga motorbike ka nguteta lir

Dimapur, Metsüremi/March 31 (TYO): NSCN/GPRN (Niki) indang UT-I staff temi Hero Karizma XMR motorbike sentsü tenenya (registration number NL 07 ED 1291) ka nguteta lir, ta NSCN/GPRN (Niki)

indang MIP sangdong ka ajanga ashi.

Iba motorbike indang Chassis number ya MBLMCU003RGC00913 aser Engine number MC01AARGC00681 alitsü.

Anungji chichiba kiburi

document tejangja bener arua UT-I office nungi iba sangdong agütsür anogo tenet tsüngta agizüka bener aotsü metetdaksür. Staff tem den mobile number 9863823864 ajanga tongtepratepsü akok, ta sangdong ajangasa ashi.

OFFICE OF THE AO STUDENTS' CONFERENCE (AKM) H.Q. Mokochung - 798601 : Nagaland Regd. No. Rs. 3072 "For the Nation"	
Ref. NAKM/GS/PR-37/2024	Date 31/03/2025
SANGDONGER	
Ao Kaketshir Mungdang 69th Buba Inti Mungdang Pangzung No. 1 nung Ao Kaketshir Naklu ken (Anthem) ka alitsü renemba nung ajemdaker Aor Ken mejemer tejangrar nungi iba nung shilem agitsü mepishir. AKM Anthem mejemtsü asoshi criteria itemi alitsü: - Ken duration second 60-80 tashi dang asütsüla. - Tekong kisüng aliba ken (Leplazü meteni) strophic form nung mejemtsüla. - Kensü ola tabensa parts pezü nung yanglutsüla. - AKM Omen mesüra AKM Lipok otsü dak ajemdaker yanglutsüla. - Lyrics, melody item ajakji Original asütsüla. Temetetsü: - Tetokteba nung shilem agirtem ajak nem Certificate agütsütsü aser shilem agirtemi ken agütsüba ajak AKM Copyright asütsü. - Shilem agirtem ajaki Luroi (August) 16, 2025 tashi nung agüja aliba contact no nung tongteprateba agütsütsüla: - Bendangnangba (Info. & Publicity Secy.) - 7085652415 - Redesen (Social & Culture Secy.) - 6009208509 - Iba mangdang aser pangzüng mapa koma ataloktsü ajaki sarasadema atadi.	
 (LANUTOSHI AIER) President	 (SATEMMONGBA) General Secy.



March 31, 2025 nü Uttar Pradesh kübok Meerut nung Eid benjung amongdang telok ana tsüingda raraba sülen police-i Muslim nunger nokdangba noksa nung angur.

India nunger ashioktsür travel agent tetsüti ka NIA-i puogo

New Delhi, March 31 (Agencies): Tim masüba lenmang ajanga US-i anir aoer tetsüti ka National Investigation Agency (NIA)-i puogo.

Travel agents aikati India nunger ashiokja tim masüba lenmang 'dunki' lenmang ajanga US-i anir aoer. Taküm ozüing alema US-i oa alir India nunger aika meindokogo.

'Dunki' ta asüba onlong ya 'katu' shiruru nungi agizükba lir. Iba tetezü documents shidak makai ozüing alema US ama linüktemi anir aoba lir.

NIA-i apusangji Gagandeep Singh (Goldie) lir. Pa ya west Delhi kübok Tilak Nagar nung alir, ta official sangdong ka ajanga metetdaksü.

Punjab kübok Tarn Taran district nung alir kati US-i aotsü atema Goldie nem sen lakh 45 agüja liasü. Ajisüaka yaküm December ita nung nisungbaji tim masüba lenmang ajanga US-i anir oa liasü, ta NIA-i metetdaksü.

Taküm February 15 nü US ketdangsertemi iba nisungbaji tangar aika den külemi US nungi meindoka liasü; iba sülen pai agent Goldie anema ken o benok.

Iba ken o ya mezüingbo Punjab Police-i agizük aser March 13 nü NIA nem agüja liasü.

India nungertem bendangleni yoktsü atema Goldie ket nung licence mesüra legal permit

mesüra registration mali, ajisüaka pai 'dunki' lenmang ajanga nisung aika Spain, El Salvador, Guatemala aser Mexico ajanga US-i yoka liasü, ta NIA-i bushitetogo.

"Goldie den külemi inyaker Donkers/associates-i Punjab nungba dakji tazük-a azük aser pa ket nung aliba sen-a rakzüka liasü," ta NIA-i metetdaksü.

March 28, 2025 nü Lok Sabha senden nung tasüingdangba ka langzüdang Union Minister of State for External Affairs, Kirti Vardhan Singh-i, "Taküm January ita nungi tenzüka tang tashi nung India nunger 636 US nungi India-i meyipa yokogo," ta metetdakja liasü.

Delhi nung BJP-i power supply ketdangsütsü memetet: Atishi



March 31, 2025 nü New Delhi nung taoba mapang Delhi Chief Minister, Atishi-i osangbenertem den jembidang tangoka noksa nung angur.

New Delhi, March 31 (Agencies): Hombarnü AAP lenir aser taoba mapang Delhi Chief Minister, Atishi-i, Delhi nung BJP sorkari power supply ketdangsütsü memetet, ta aitsü.

Taoba ita BJP sorkar tentetba sülen electric light aoba kanga bulua kümogo, ta lai ashi.

Iba dak sendakba nung BJP-i tang tashi nungbo telangzüba kecha magütsü.

Osangbenertem senden ka nung jembidang Atishi-i, "Linük yimtiba nung AAP sorkar marudang mapang shia light oadok aser mapang talanglang

light maru. Kibong ajak nung inverters liasü. Ajisaüka 2015 küm February ita nung Delhi nung Arvind Kejriwal chief minister akümba sülenbo light oadokbaji puti otsü ka dang aküm," ta metetdaksü.

Rajya Sabha nung BJP-i aniba central sorkari data ka tetshia Atishi-i, AAP sorkar yimsüsüba kübok Delhi nung electric light methitemi aru, ta metetdaksü.

"Delhi nung nüburtemi data menüingdak, kechiyong tesüiba küm 10 tsüingda Delhi nung alirtemi inverters mamshiba aser battery melentsü menüingdakbaji parnoki meteta

dang lir. Ajisüaka tang yimti nung BJP sorkar aruba sülenbo light aoba kanga bulua kümogo," ta laisa metetdaksü.

"Tesüiba küm 10 tsüingda light mao saka BJP yimsüsüba kübok ita ka tsüingda light oadokba ya kechiba? Iba tetezü BJP-i sorkar ketdangsüba memetet. Delhi nung nüburtem tenzüksü atema parnok tebilemba mali mesüra nüburtem koma tenzüksüar memetet," ta Atishi-i ashi.

Taküm February ita nung agiba Delhi assembly elections nung BJP-i menden 70 nungi 48 tashi nung takok ngua AAP sorkar atsüingdoka liasü.

Eid benjung anogomong nung tenokdangba aika liasü

New Delhi, Metsüremi/ March 31 (Agencies): Hombarnü India tesem balala nung Muslim nungertemi Eid-ul-Fitr benjung amongba mapang nung tenokdangba aika benoka liasü, talisa Uttar Pradesh nung tenokdangba teimba liasü.

India tesem balala nung Hindu-Muslim tsüingda rara madoktsü atema state aika nung ketdangsertemi sepai aika duty lezmüksü.

Uttar Pradesh kübok Sambhal nung police-i lokti aliba tesem nung sarasademba nokdangba den külemi loudspeakers amshiba nokdanga liasü. Uttar Pradesh nungsa Meerut yimti nung gari lenmangtem nung sarasademertem nem temerenshi agütsütsü ta sangdong.

Himachal Pradesh yimtiba, Shimla nung Hindutva teloktemi amokmerenba ajanga school ka nung Eid benjung sentong thinena liasü.

Meerut nung police-i, lenmangtem nung Eid

sarasadem agirtem nem temerenshi agütsütsü, iba dak alia passports aser license thinentsütsü, ta metetdaksü.

Superintendent of police (SP) Ayush Vikram Singh-i, "Gari lenmangtem nung sarasadem magütsü atema tetuyuba agütsüogo," ta metetdaksü.

Shimla nungbo Hindutva telok kati jelia amokmerenba ajanga school ka nung Eid benjung mamong. Dev Bhoomi Sangarsh Samiti teloki school nung Eid benjung mongra majungtsü, ta amokmerena liasü.

Auckland House School nung ketdangsertemi, India nung yimsü balala aika aliba ya kaketshirtem nem angatetdaksütsü atema Eid sentong renema liasü, saka kari amokmerenba ajanga iba sentong thinen, ta metetdaksü.

School ketdangsertemisa, school nung Holi, Diwali aser Khristmas benjungtem ayongzüka amongba ama Eid benjung-a amongtsü ayongzüka liasü, ta metetdaksü.

Taruba Ato kilonserji RSS-i shimtsü: Sanjay Raut



New Delhi, March 31 (Agencies): Hombarnü Shiv Sena (UBT) MP, Sanjay Raut-i, Ato kilonser Narendra Modi melentsüsangji Maharashtra state nungi asütsü aser "Rashtriya Swayamsevak Sangh (RSS)-i shimtsü, ta metetdaksü.

Osangbenertem den jembidang Raut-i, "Modi melentsüsangji Maharashtra nungi asütsü aser RSS-i iba telemtetbaji agütsü," ta metetdaksü.

"Yaküm September ita nung pai (Modi) pa anisüngzüksü atema RSS headquarters-i oa liasü," ta Raut-i metetdaksü.

Lenirtemi arrshi küm 75 nungbo anisüngzüka arudar, ta pai ashi.

Amongnü (March 30) Ato kilonser Modi-i Nagpur nung aliba RSS headquarters semdanga liasü.

Raut-i jembiba o dak sendakba nung Maharashtra chief minister, Devendra Fadnavis-i, "2029 küm nunga Modi maneni Ato kilonser asütsü. Pa melen shimtsü atema nübo bushütsü nüngdak mali. Pa (Modi) ozü lenir aser maneni inyaksü," ta ashi.

"Asen sobaliba nung, tebu ka taküm ali tashibo pa melen shimtsü atema jembibaji tim masü. Ibaji Mughal sobaliba. Iba atemaji o lemteptsü ano mapang matong," ta paisa ashi.

Amongnü Ato kilonser Modi-i RSS headquarters semdang aser Reshimbagh nung aliba Smruti Mandir nung RSS tentetsang, Keshav Baliram Hedgewar nem akhüm agüja liasü.

Modi den RSS tongti lenir Mohan Bhagwat, Union Minister Nitin Gadkari aser Maharashtra Chief Minister Devendra Fadnavis nungera liasü.

Tesülen Ato kilonser Modi-i X ajanga, "Nagpur nung Smruti Mandir semdangbaji jangratemtsüka liasü. Tanü semdangba yasa balaka liasü, aser ibaji Param Pujya Doctor Sahab asoba anogomong nung asüba agi lir," ta metetdaksü.

Paisa RSS nung inyakterem nem tenüngsang agüja, "Tzümet süng aser menoknok ama lendong balala aser tawa Maha Kumbh benjung mapang nung parnoki tenzüka mapa tajung inyakbaji ajaki meteta lir," ta metetdaksü.



TIR YIMYIM YIMOBILEM (EDITORIAL)

DIMAPUR TUESDAY, MARCH (RONGCHII) 01, 2025

Nütsüng Züngdangba Küm

2011 küm tesüsa India nung nütsüng yongsük züngdanga liasü aser taküm agi joko küm 15buba nütsüng-yongsük mezüngdangaka taküm küm tatembanglen tashi nungbo India nung nütsüng billion 1.46 dak tali akümtsü aser ibaji alima nung nütsüng shilem 18 jungnüa asütsü ta asadangteter. 1881 küm nungi tenzüka India nung küm 10 shia nütsüng yongsük sükdanga aruogo, anungji shidakba agibo 2021 küm nütsüng züngdangtsüla, ajisüaka coronavirus wara aliba agi nütsüng yongsük züngdangba maparen (census) atsülanga liasü. Linük nung terenlok mapatem inyaksü aser asalentong balala yanglutsü atema mapang shia nütsüng yongsük züngdanga jangjatsüji kanga tongtibang, ajisüaka wara aliba agi 2021 küm census magiteti aruba sülen taküm ya nütsüng züngdangba küm asütsü aser 2026 küm tashi nungbo tembangtsü sorkar sentong lir. India nung dang masü saka tanga linük kar nunga Covid wara aliba agi census atsülanga liasü saka parnokbo census agiadokogo. Covid wara süir joko pezü dak tali süia arudar saka India nungbo tang tashi census metenzüker. Taruba census agiba mapatong yabo tesüiba mapang dang nungi khenyongi balaka asütsü, kechiyong taruba census ji 'digital census' asütsü ta sorkari metetdaksüogo. Sorkar ketdangsertem aser school tesayur lakh 30 dak temai iba maparen inyaksü. Tesüiba mapangtem nungbo census agitsü atema ita 11 tashi agi liasü saka tangbo technology teyari ajanga mapang tatsüba agitsü imlar. India ama linük tuluka nung nütsüng yongsük züngdangba maparen ya atamata mapa ka masü. Ajisüaka census agiba ajangadang linük nung nütsüng kwi aliar jangjaba den külemi nütsüng-nüburtem rongsenketzüng jenjang, atsüapong (tetsür-tebur kwi), kanga sensak tia nung alirtem kwi, middle-class pur kwi, takar kwi, matamabensarterm kwi, kibong kümer alir kwi; item ama osangji tejangja metettsü. Item osangji jangjaba ajanga dang sorkari nüburtem taküm jenjang ajungkettsütsü atema asalentong junga yanglutettsü. Census agia nütsüng jangjaba ajanga nüburtem jenjang junga angatetter, ibayongji sorkari census nung sen crore aika indok mesasar. Ajisüaka pezü dak tali census atsülanga ya ajanga nütsüng nübur aika takoksa ngudar. Tatishitsü agi, tesüiba küm pongu tashi tanur asoba aser nisung asüba report mali, aser ibaji ajanga healthcare asalentong junga meyangluteter, scheduled castes aser scheduled tribes nübur aikati reservations maongka magiteter mesüra sensaker aikati Food Security Act kübok teyari magiteter. National Food Security Act, 2013 ya India nung nütsüng shilem 67 nem jenjang dalang agi jang agütsütsü atema lir, ajisüaka 2011 küm census agiba sülenbo tang tashi census magiba agi India nung million 100 dak temai Food Security Act kübok teyari magiteter. India nung dang masü saka bendanglen-a research agirtemi India nung rongsenkettzüng aser loktiliba jenjang asadangtsü atema nütsüng yongsük osang tejangja nüngdaker. Rongsenkettzüng tsütsü mongintem, loktiliba meteter mongintem aser shishirtemi linük atema asalentong tajung benoktsü asoshi census data nüngdaker, saka 2011 küm census agiba sülen joko taküm agi küm 14buba census magitetba ajanga lenla aika nung takoksa ngudar.

OLEMSABANG

NÜBURTEMI PEI TEMEDEN TASÜ-ITA JEMBITSÜLA ASER OLA ADOKTSÜLA

~ L.Kika Pongener.

Küm aika asenok tangatetba nung anunga aliba agi pei temeden jembitsü aser ochi ola adoktsü tasü meiti lia aruogo. Ajisuaka, tanubo asenok nüburtema sorkar anema-a suang, mesura yimsüsür anema-a suang tim masüba nungpo yabo tim masüa ta ola adoktsü aser pei temeden jembitsü terabo meteta kümdar ta kanga pela-a bilemer. Asen kidanger Assam aser Manipur lima nung mapang shia nüburtemi lokti tulu ola madoki yimdong sua jajaba (Silent Procession) aser lokti tulu mongdang (Public Rally) ayongzüka angur. Ano mapang kar nungpo shishilempaba mapa ajak shibanger aser lenmang nung gari mesenzüdaktsüi shibanger (Total Shutdown) mokdang ayongzüka-a angur. Sorkar-i nübur mepelatsüsa inyakyim kar nung aibelena inyakra agi, nüburtemi tejashiba sayua iba amala mapatemji inyaker. Nüburtemi sorkar inyakyim kar nung mulong masüba ajitetra, mesura nübur jashitsüsa sorkari aibelena maparen kar inyakra, nüburtemi ajem-ajema meli-i tejashiba sayua külemi longjemer tasü-ita ola adoktsüla. Aji oda, sorkar-i aibelenaka nüburtemi ola madoki yutsüra, asen lima ya kibur maliba linuk ka amai küma aotsü aser yimsüsürtemi nübur aküm-metsübuttsü.

Aji oda, kodang-sa sorkar-i mesura yimsüsürtemi nübur temulong masütsüsa, mesura nübur mepelatsüsa tim masüba maparen kar inyakdir, idangji iba anema mulongtet telok aser lokti-tentet ajaki longjemer tasü-ita ola adoktsüla. Küm ishika suio, Urban Local Body (ULB) Election dak sendakba onuk nung nübur ajunga külemi longjemer mokdang ayongzüka tasü-ita ola adokba agi takok anguba aser temelenshi ka bener aruba ajangshia aruogo. Asen Naga lima nung iba tatalokba to otsü-sutsü mapa ka asütsü. Aji oda, sorkar-ji yimsüsür shirnok nokdak-a ali, parnok kija meyong masü, saka nübur meyong sorkar asünung, tim masüba nungbo sorkar anema-a suang, yimsüsür anema-a suang, sorkar tenzüker anema-a suang tasü-ita ola adoktsüla, aser iba mapa nungji tongtipangsa lanurtem aser kaketshirtemi shilem tuluba agitsüla. Atangji, asen lima teraksa yanglushitsü asoshi ochimashi aser tim masüba mapa anema ola adokba nung kecha aibelen mali.

Tawa Dr. Imkongliba Memorial District Hospital (IMDH) Mokokchung nung Doctor aser teinyaker peria maliba atema sorkar dang tejashi sayua Ao Kaketshir Mungdang (AKM)-i 'Public Rally' ka ayunga agiba ngua kanga-sa tim mapa ka inyakogo ta kanga pela-a bilemogo. Ano anogo ishika tejaklen Foothills Road dak sendakba nung sorkar o Nagaland Foot Hill Road Construction Committee (NFHRCC) na tsüngda nung ken o ka ashishitepba-a osang kaket nung nguogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Andhra Pradesh nung pastor, Praveen Pagadala sür lia angu



March 31, 2025: Andhra Pradesh state nung Khristan sayutsüngir aser Khristan yimsü pusema jembir, Pastor Praveen Pagadala sür lia nguogo.

Hopta ishika tejaklen pai pa taküm lendong aliba lemsatepa liasü.

Mezüngbo ketdangsertemi pa gari lendong nung asü, ta metetdakja liasü, ajisüaka Khristantemi temelung melemi rongshiba ajanga state sorkari iba tatalokba bushisüngdangtsüsa aküm.

Arrshi küm 46 pastor, Praveen Hyderabad yimti nungi Rajahmundry-i apusoa liasü; iba sülen Mongolbarnep (March 25) gari lenmang tezülen pa sür lia angu.

Tawa pai pa taküm lendong nung aliba tebilemtsü kar denbo lemsateper liasü, talisa pai yimjak nung Khristan yimsü pusemba aser tanga yimsü aitsüba ajanga pa kari amokmerena liasü, ta Open Doors UK-i metetdaksü.

Hombarnüa pa sarasadem sentong ka nung dena liasü, iba sülen anogo ka dang lirbo pa tasü mang lenmang tiplen angu.

Pa asüba osang angashiba sülen Khristantemi longkak aitba den külemi sorkar ketdangsertem dang iba tatalokba jungjunga bushisüngdangtsü takhangba agütsü.

State Chief Minister N. Chandrababu Naidu-i police dang iba tatalokba jungjunga bushisüngdangtsü tuyuba sülen special investigative team (SIT) ka tentetogo. Iba dak alia executive magistrate-ia iba tatalokba bushisüngdangtsü.

Bodhbarnü Khristan organization balala nungi Khristan noklang aika Hyderabad nung aliba Government General Hospital kima adenshir longkak aita iba tatalokba bushisüngdangtsü takhangba agütsü.

Khristantemi longkak aitba ajanga hospital ketdangsertemi post-mortem agitsüsa aküm, ajisüaka tang tashi nungbo iba report ji magütsü.

Putir aser Federation of Telugu Churches nung advisor

Anthoniraj Thumma-i, iba tatalokba nung melung malemtsüsa kuli aika lir, ta metetdaksü.

Paisa, Pastor Praveen Pagadala-i television nung o entepba sentong aika nung shilem agia aruogo, ta metetdaksü.

Paisa, pastor Praveen ket nung gari lir ajisüaka kechiba aonung pai motorbike nung ang aini aoar ni süngmanger, ta ashi.

Thumma-i ketdangsertem dang CCTV noksatem ajanga bushisüngdangtsü aser pa tasü mang anguba tesem nung alirtem danga asüngdangtsü takhangba agütsü.

Federation of Telugu Churches nung secretary, Pastor Karunanidhi Indupalli-i, Pastor Pagadala-i pa taküm amokmerenbaji par züngsemtem den lemsatepa liasü, ta ashi.

Longkak aitba sentong nung shilem agir Pastor V. David

Naveen-i, pastor Praveen asüba ya ajanga region nung tesü nep raksatsütsü, ta ashi.

Sayutsüngir K.A. Paul-i, Pastor Pagadala ya Khristantem atema ola sashia adoker lenir ka liasü, ta metetdaksü.

Taoba mapang Chief Minister Y.S. Jagan Mohan Reddy-ia pastor asüba kuli tejangja metettsü atema bushisüngdangtsüla, ta shiogo.

South India nung Pastor Pagadala ya aikati meteta aliba sayutsüngir ka lir. Pa ya kaketzülur ka aser Khristan yimsü pusema jembir ka liasü.

Pastor Praveen Pagadala-i kinüngtsü den tanur ana toksür pilaogo.

Delhi nung amenoka aliba United Christian Forum (UCF)-i ashiba agi, yaküm India tesem balala nung Khristantem anema inyakba tatalokba 800 dak tema liasü.

India nung nütsü ng shilem 2.3 dang Khristantem lir.

ANO GO ABEN TSÜNGREM DEN

Miim Teyari (T. Ken 46:1-11)

1. Temetetba bushir tezülur H.G. Wells i ashi, "Tsüngremji timtem mapang nung maliba teyarir ka lir." Pa tai liasü. T.Ken 46-48 Tsüngremi tesü ng mangtsü sayatenya mapa inyakba nungi Israel otsü ainba angur. Yihuda nung Hezekia chubaba mapang nung Assyria nungeri linükji amak. Chubai iba timtem Kibuba dangi aben, aser Pai Israel nunger asem. Kibuba Kotak tenyari kü ne pyongi Assyria nunger 185,000 tepset. Asenokia tasü itta nokdaksü akok , kechiaser Tsüngremi teyari agütsür.
2. Tsüngrem asen jenokdak; asenoki tsübuttsü menü ng dak (t.1-3). Pa lir, pa dangi aotsü akok aser teperi- timtem mapang nung teyari talubusa agütsür. Tsüngremer nübur timtem ajanga aor. Khen khen asenoki tashi mangaba agi; khen khen asenoki tashi angaba agi; aser khen khen tashi itta alitsü nü ng dak ta pai metetba agi asen yarir. Nai ne jenokdaki oa lir ma ? Ne nü ng dak tashi aser taochi agir tejakleni aotsü asoshi pa dak atsü kokang aser ne mapatem inyakang.
3. Tsüngrem asen tashi lir; asenok lulatsü menü ng dak (t. 4-7). Asenok anokshia aliba tzüyim (t.2) nungi süngjema aliba ayong dangi aor (t.4). Yirusalemji ayong anasa masü. Ayong melena Hezekiai ali telung nungi yimli-i tzü mesür aru. Kasaji miima aliba tashi nung asenok alitsüla. Asenoki alima dak metaloker mesüra asen meketa aliba nüburtem dak metaloker alitsü makok. Kodang Yisuji Kümtetdakba ta amangdir, Tsüngremi ne Taküm Tzü ayong ka poktetdaksütsü. Alima tejakrep tzüpong dang akadang, Taküm Tzü apokdak ayong akümtsü. Yisu nungi asen nü ng dak tanelaren teyari angur. Na tanü Ayong nung jagi jemdar ma? Arakseta aliba lima nungi ne tenük agienang aser Tsüngrem ne tashi ta bilemtetang. Ne taküm Tsüngremi agütsüba miim teyari nung mataloker alir. Na lulatsü menü ng dak mesüra shisabulu aser tetsübu den alitsü menü ng dak. Tanü Tsü kchir na amaker ama bilemtsü akok mesüra tatitang ajanga aor. Teyari Tsü ngrem nungi agir ta jangjaang. Pa ne tashi tatsü kokdak.
4. Tsü ngrem teyari teti dena lir; asenok lulatsü menü ng dak (t.8-11). "Sü ngjema liang" tetezü "ne teka metongang aser Tsü ngremji Tsü ngrem sü dakjang." Aiben asenoki Pa mapang aser inyakyim matatetter. Lulaba jagi asen Satani amakba nung amajok kümdaksür. Asenok sü ngjemtsüla, sü ngjema nokdakang aser sü ngjema menang.

Uganda nung Muslim tsür kati miim chidakja Khristan apuani südaktsü

Nairobi (Kenya), March 31, 2026 (Agencies): Anü doklen Uganda nung Muslim tsür kati Khristan apuani ka nem miim chidakja südaktsü; kasa tatalokba nungji Muslim tsürlar jala-a memeteti kasa chiyungtsü nungji miim chisema asü.

March 16 nü Butaleja District kübok Nabiganda jila nung kiyonger Muslim tsür, Hanifa Hamiyat-i Khristantsür, Doreen Nairuba aser la kinü ngbu Jackson Wampula na den chiyungtsü kar lemsatepa liasü. Hanifa-i chiyungtsü nungji miim indoktsür agütsüba ajanga Nairuba süadok. La ya ita trok mashisa liasü. La kinü ngbua tasü ngnüji süadok.

Hamiyat'er jala, Marriam Kapisa-a kasa anogo nungjisa asü. Tetsüi chiyungtsü nung miim inoka alibaji lai memeteti achiba ajanga la-a süadok.

Nairuba-i arrshi küm 18, Marriam den Khristan yimsü indang lemsatepa aru.

Khristan apuani jagi March 16 nü Marriam Tenla kidangi anir aiba ajanga tetsü, Hamiyat kanga jashia liasü, ta kiyonger kati metetdaksü.

Muslim nunger kiyonger kati Doreen Nairuba aser la kinü ngbu Jackson Wampula nati Marriam Tenla kidangi anir aobaji anguba sülen Hamiyat nem metetdakja liasü.

Hamiyat kanga jashi, ajisüaka 'Ramadan' mapang asüba agi lai ola madok.

Ramadan mapang nung Muslim nungertemi anepdang nungi lumiba sülen aonung tangar den-a chiyungtsü lemsatepa chiyunger. Ajioda aonung 7:00 ako meta Hamiyat-i chiyungtsü nung miim inoker Khristan apuani nemji bener yoka liasü.

"Hamiyat'er jala jagi tetsüi chiyungtsü nung miim inokja alibaji memeteti liasü. La Doreen'er kidangi aoba sülen parnok asemprong chiyungtsüji lemsatepa

chiyungba sülen la kidangi meyipa ao. Ki atongba sülen la tebok perep tenzüka saaktsüa liasü," ta kiyonger kati metetdaksü.

"Hamiyat-i lar jala dang na kechi agi timtemer, aser kechiba na menoa kazü? ta asü ngdang. Ajioda jala jagi tetsü dang Doreen'er kidang parnok ajak chiyungtsü lemsatepa chiyung ta ashi. Iba mapang nungji Hamiyat kanga aoksaa liasü. Idangyongjisa lai lar jala hospital-i anir ao saka mekü mzükteti ashi," ta kiyonger kati metetdaksü.

Ano külen kasa mapang nungji Nairuba aser la kinü ngbu nata tebok perepa timtemba mapang nung kiyonger ka par kidang jagi ao.

"Ni par kidangi aoba mapang nung tena temang kanga mejungi liasü, anungji ni tenaprongla anasa aliba clinic kati anir aoba sülen mozü kar agütsü. Iba sülen hospital kati anir ao saka

hospital atongba mapang nung Nairuba süadok aser la kinü ngbu Wampula-a tasü ngnü asü," ta kiyonger kati metetdaksü.

Kiyong nung lenirtemi Hamiyat jaoka asü ngdangyaba mapang nung lai chiyungtsü nung miim inoker agütsübaji nangzüka liasü.

"Ni ozü jala südaktsütsü tebilemba maliasü. Kü nü kjidongbo kiyonger apuani südaktsütsü atema dang liasü, kechiyong temeshi Ramadan mapang nung Khristan apuani jagi ozü jala Tenla kidangi anir ao," ta lai nangzü k.

"Asen Imam-i asenok dang, nai mamanger ka tepsetra Allah tsü ngremi Jannah [paradise] sempet agütsütsü ta ashir. Ni Jannah ji ngunüba ajanga mamangertem südaktsü," ta laisa ashi.

Tang Hamiyat police ket nung lir aser April 2 nü ken o angadangtsü.

AO OSHI ANGAZÜKDAK:**TANÜ ANGAZÜKTSÜBA OJANG****Temapak**

(v) amoui orr temang meyipshiba (turn over during sleep)

* Temapak yimya alir den külemi shingaia memejangner.

Tematsük

(adj) tapak, apakapaker (flat)

* Long tematsük agi longnen yanglur.



Tir Yimyim

OLONG PAITEP # 7109

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. --- tatsü - (3)
12. Tebur kidong aser zünga - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7108 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüingdak, 10. Yongya,
11. Kongro, 13. Ora, 14. Ata.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Arunachal kübok Kenzamani nung 'Freedom Trail' trek tenzükögo**Itanagar, March 31, 2025**

(Agencies): 1959 nung 14 buba Dalai Lama, Gyalwa Tenzin Gyatso-i jajaba bilemteta tanü anüingdang nungi Kenzamani nungi anogo troknü trekking sentong ka tenzükögo.

Iba sentong ya Tawang Deputy Commissioner Kanki Darang lenisüba kübok District Administration-i ayongzüker aser MLA Lungla Tsering Lhamu o Chairman DoKAA Jambey Wangdi nati teyari agütsür.

Iba sentong nung Additional Deputy Commissioner (ADC) Lungla Tashi Dhondup aser Extra Assistant Commissioner (EAC) Jemeithang Deewan

Mara nati yariteper.

Iba sentong ya April 5, 2025 nü Pungteng, Tawang nung tembangtsü aser iba anogo ya Dalai Lama-i 1959 nung Tawang atongba anogo lir.

Tanü sentong tenzükdang Dalai Lama atema sarasadem aser iba sülen sobaliba shilem balala agia liasü.

"Asenoki anogo troknü Freedom Trail nung trek tenzükdang Dalai Lama indang shisatsü nungi tashi angur aser tarutsü tajung aginür. Asenoki Tibet den tesentaktep tajung lir aser putiotsü, sobaliba lemsatepba den kati ka akhümtsübuteper" ta MLA Lungla Tsering Lhamu-i ashi.

DoKAA Chairman Jambey

Wangdi-ia shilem agir ajak dang pelaba metetdaksü aser Dalai Lama arishi talang den anema alitsü moatsü.

Lungla administration aser EAC Jemeithang ajanga iba sentong nung yaritepba atema pelar, ta Deputy Commissioner Kanki Darang-ia ashi.

Kenzamani ya putiotsü nung kanga tongtipang tesem ka lir aser iba tesem nung 1959 küm ketdangsürtemi Dalai Lama mezüing agizüka liasü, ta pai ashi.

1962 nung iba tesem kümzüka ayutsü atema taküm bendanga agütsüba sepai ajak nem tetushi agütsür, ta Kanki Darang-isa ashi.

Tinsukia Police-i nakmati shibelener 4 den sen aika apu**Digboi, March 31, 2025**

(Agencies): Lekhapani Forest team-i Ledu police den yaritepa Kaushal Singh'er kidang nungi Rs 3,06,600, 35 files aser taitüsü aketba kulikakettem ngutetogo.

Kaushal ya taoba nung Tinsukia district kübok Ledu nung nakmati shishilembar ka liasü.

Iba ken o dak sendakba nung police-i nisung 4 puogo.

Assam police aser forest department külem telok kati Honibarnü nisung ana apu. Tena yagi Lekhapani Reserve Forest nung diesel bener oa ayuba atema tai tonglokja apu.

"Nakmati shibelener Kaushal Singh aser pa den yariteper Rahul Singpho o Anil Prasad nungeri gari ka nung diesel 200 liters bener ao. Iba ya protected aser banned

areas nung rat-hole mining nung amshitsüba liasü" ta police-i ashi.

Iba sülen police-i Kaushal'er jabaso Shrij Singh apu. Pai sorkar ketdangsürtem aser police den raraba atema tai tonglokja apu.

Lekhapani Forest Range nung ozüing alema inyaktertem sotba atema Digboi DFO TC Ranjith Ram, IFS-i pelaba metetdaksüögo.

CoTU Sadar Hills General Secretary & Vice Chairman shim**Imphal, March 31, 2025**

(Agencies): Sadar Hills, Kangpokpi District nung Civil society organizations (CSOs) ajanga N. Sehjalien Gangte-i Committee on Tribal Unity (CoTU) Sadar Hills atema General Secretary inyaksü shimogo.

Pa den külemi Thangkhomang Chongloi-i additional Vice Chairman inyaksü shim.

April 1, 2025 nü Kangpokpi District Headquarters nung Kuki-Zo leaders' consultative meeting amentsü aliba jakdang iba ya inyakogo.

Iba senden nung Kuki-Zo nungeri Separate Administration meshiba indang onük jembitsü.

Taoba General Secretary, Lamminlun Singit-i kibong



khuret kar ajanga menden nungi sodi agiba sülen lenisüba melenshiogo.

Kuki Inpi Sadar Hills, Sadar Hills Chiefs' Association, kaketshir teloktem, Kuki Women's Union aser sendaktepa alirtem jembitepba sülen Gangte shimtet.

Pa ya Kuki-Zo nunger rongnung akhümtsübuba lennir ka lir aser tesüiba nung tongtipang mapa aika inyakogo. Pai CoTU relief committee nung

Secretary aser executive body nung Joint Secretary inyakogo. Gangte-isa 2015 nung Kuki Inpi Sadar Hills General Secretary inyaka liasü.

Külen, Haijang nunger Thangkhomang Chongloi ya lanur lennir ka lir. Tang ya pai Kuki Inpi Sadar Hills nung Youth Affairs ketdangsüa repranger.

Tanü Rev. Mangkholen Kipgen-i lennir tasen ana meshiteta sarasademtsü.

Office of the
KINUNGER WATSÜ TELEN
P.O.Sabangya, MOKOKCHUNG, NAGALAND
Nük : Telongjem Ajanga Takok

TENÜNGSANG AGÜTSÜR




Dr. Zülulemba Ao
Asür Wb. Meritong aser Wt. Lanutola jabaso **Doctor of Ministry** Khonang International Institute of Mission and Leadership Bengaluru nungi ngutet nung, Kinunger Watsü Telen-i khonang tetushi agütsür.
Tsüngremi ne taküm, kibong Pa wadang asoshi tali amshiang ta sarasademtsür.

Sd/-
Mrs. Bendangmerenla
President, KWT

Sd/-
Mrs. Aolepla
Secretary KWT

US-i amak nungbo telangzüba tesashi agütsütsü: Ayatollah Ali Khamenei



Tehran, Metsüremi/March 31 (Agencies): Washington den nuclear deal tasenba tezüngzüktep yanglutsü Iran-i memulungra bomb pokloksütsü akok ta Tir Donald Trump-i amokmerenba ama inyakra United States nem telangzüba tesashi agütsütsü, ta Iran Supreme leader Ayatollah Ali Khamenei-i Hombarnü tekum dangtsü ashi.

"Parnoki samaro mapa inyaktsü amokmeren. Yamaji inyakra, kechi südir süaka meyiper amakba alitsü," ta Khamenei-i live speech ka nung US-i amokmerenba athishia ashi.

US-i nuclear deal benoka aliba Iran-i magizükra bomb pokloksütsü akok aser secondary tariffs meshitsü ta Trump-i tekum dangtsü ashiba sülen iba sangdong ya agütsü.

Deobarnü NBC News den telephone ajanga jembidang, Iran-i iba sentong sülen anidaktsü hopta ishika agütsü aser iba deal renloka aoba nung ajemdaker tarutsü nung mera agitsü ta shia liasü.

"Parnoki deal meyanglura, yangji bomb pokloksüba alitsü. Parnoki kodanga mongudangba ama bomb pokloksüba alitsü," ta Trump-i ashi.

"Parnoki deal ya meyanglura, ni küm pezü jakdang inyakba ama secondary tariffs meshitsü," ta pai ashi.

Iran-i iba deal agizüktsü akok, saka parnoki magizükra tensa majungtsü, ta Trump-i shia liasü.

"Saka kechi atalokdir asenoki repranga atatsü... Parnoki deal yanglutsü dak alaka danga kecha

meinyaktettsü ama bilemer. Ni asübo danga lenmang mebushie deal ya ang yanglula, koba alima nung alir ajaki meteta lir, aser ibaji tajung masütsü. Aser ni ajibo maginer," ta US tiri ashi.

Ano maneni Khamenei-i Israel samatsütsü ayongzük aser "Iba region nung proxy force ka dang lir aser aji ochimashi agi sünger aliba Zionist yimli ya lir," ta pai ashi.

Aji masü dang Iranian state media ajanga video ka prokshiba nunga Tir Masoud Pezeshkian-i foreign minister Abbas Araghchi ajanga Oman nung intermediaries ajanga Trump nem Tehran tangatetba osang agütsüogo aser indang indanga jembishinütsü memulunger, ta shia liasü.

Supreme leader-ia 'indirect negotiations' maneni alitsü ta nenshia ashi, ta paisa jangjashitsü.

"Onoki ken o jembiba nungi jenshia mesenzür," ta Pezeshkian-i ashi.

Trump tanaben US tir akumba sülen US aser Iran tsüngta tensa tamajungba kumogo, kechiaser par administration ya Iran-i nuclear nok-nü yangluba nungi nokdangtsü temulungtetba nungajang-ajanga nokdaka lir.

Mezüng kümsük mapang Trump-i US ya 2015 nuclear deal nungi agien, koba Iran indang nuclear sentong azüoktsü nükjidong nung yanglua liasü, aser iba sülen Tehran-i iba deal sülen manidaker ta tai tongloksü.

Iba tezüngzüktep nungua China, Russia, France, Germany, Britain aser European Union dena liasü.

Russia-i drone amshia tanen makai Ukraine amaker

Kyiv, Metsüremi/March 31 (Agencies): Russian sepaitemi Hombarnü agi anogo tanabuba Ukraine kübok Kharkiv yimti nung Kyivsky district nung kamikaze drones amshia amak, ta Mayor Ihor Terekhov-i ashi.

Iba mapang tesem balala nung mi adoka emergency services ajanga nüburtem den yaritepa liasü. Anepdang 5:55 ako tashinung kasa tesem nung trokben apokba ketdangsür temi osang agütsü. Nisung ana temang tera yirua mozüki nung anepalua liasü.

Iba mapang kaket reju ka raksatsü aser temeket nung high-rise buildings indang kichiba jaksatsü aser gari ishika nung kongshi, ta Terekhov-i ashi.

"Tanü drones ter dak tema Kharkiv nung khaloktsü, koba Ukraine nung yimti tulutem rongnung ka lir," ta governor Oleh Syniehubov-i Telegram nung zülua liasü.

"Kecha linükia iba ama majurutsüla," ta pai ashi.

Kharkiv ya Ukraine northeast tsütsü lir aser linük nung yimti tulutiba jenjang tanabuba nung lir aser Russia den arütsü nungi kilometre 40 shi pilar lir. Tashi ajak amshia amak metenzükdang, iba tongtipang industrial, scientific aser cultural centre nung nisung 1.4 million dak tema liasü.

Russian sepaitemi attack drones, missiles, guided aerial bombs (KABs) aser multiple

launch rocket systems (MLRS) amala amshia Ukraine tesem balala nung tanen makai amaker.

Russia ketdangsür temi civilian dak aser ki o jen nung asaa mamaker ta maneni shiaka yamaji amakba ajanga mozüki, kaket reju, kindergartens, energy facilities, water system aser nisung aliba tesem nung kongshia civilian asür aser teraksa jenti agütsür.

Deobarnü Russia-i drone amshia amakdang Kharkiv nung military hospital ka, shopping centre aser apartment blocks nung kongshia nisung ana asü aser aika yiru, aser US Tir Donald Trump-ia Russia Tir Vladimir Putin dang jashiba lemsatepogo.

Afghan nunger million 3 mintoktsü Pakistan sentong lir

Peshawar, Metsüremi/March 31 (Agencies): Taküm Afghan nunger million 3 mintoktsü Pakistan sentong lir, kechiyong parnok pei mulungka nung linük yimtiba aser iba temeket nung aliba tesemtem toktsür aotsü atema atakzükja aliba anogo Hombarnü tembangogo.

Pakistan nung ozüng alema lia alirtem shirnok timba Afghan nunger lir, item nisungtem mintoktsü atema 2023 küm October ita nungi linük ajunga nung meita aoba sentong ka tenzükba sülen tang iba jenjang agitsü sentong yanglur. Iba inyakyim benokba atema rights telok, Taliban sorkar aser UN-i Pakistan aitsüogo.

Ozüng alema lia alirtem pudena yoktsü atema inyakyim April 1 nü tenzüktsü liasü saka Ramadan aliba ajanga April 10 nü tashi thinenogo, ta Associated Press sangdong ka ajanga metetdaksü.

Taoba ita 18 tsüngda Afghanistan nunger 845,000 shi Pakistan toktsür ogo, ta International Organization for Migration indang data ajanga sayuogo.

Pakistan-i ashiba agi, Afghan nunger ano million asem lir. Item rongnung parnok 1,344,584 ket nung Registration cards kuli bena lir aser nisung 807,402 ket nung Afghan Citizen Cards lir.

Maneni Afghan nunger million 1 ozüng alema Pakistan nung lidar, kechiyong parnok ket nung kuli kaket kecha mali.

Pakistan-isa, Afghan nungertem yokba sülen meyipa marudaktsütsü atema jenjang agitsü ta shiogo.

Ketdangsürtemi Afghan Citizen card bena alirtem linük yimtiba Islamabad aser Rawalpindi yimti March 31 nü tashi nungbo toktsür

Afghanistan-i odaktsünüa liasü, ajita mesüra parnok tashiyim agi meyipa yoktsü.

Registration kuli aliba nüburtem Pakistan nung June 30 nü tashi litettsü aser Afghan nunger shirnok tanga linük nung oa ameoka alitsü atema lir parnoka March 31 nü tashi nungbo Islamabad aser Rawalpindi toktsür aotsü tetuyuba agütsür liasü.

Ketdangsürtemi ashiba agi, parnoki Afghanistan nungertem tanga linük nung amenoker lidaktsütsü atema bendanger diplomatic missions tem den inyaktsü, saka iba sentong takok mongutetra parnok Pakistan nungi meyipa yoktsü.

2021 küm Taliban-i sorkar atsüngba sülen Afghan nunger meyrejang aika linük toktsür jena ao. Parnok sentong ka ajanga US nung oa alitsü atema temelaba agüja liasü. Iba sentong ya America sorkar, media, aid agencies, aser rights group tem den inyakba ajanga lendong nung aliba nüburtem yaritsü asoshi benokba liasü.

Ajisüaka tir Donald Trump-i January ita U.S. refugee program sota lir aser Afghan nunger 20,000 taolen makai kümer lir. Taliban-i Afghan nunger refugee tem linüki meyipa arudaktsüner.

"Afghan nunger ketdangsürtemi committee mesüra telemtetba agiba inyakyim nung shilem magidaktsütsüla," ta kuli kaket ka nung Afghan nunger mintoktsü atema sentong yangluba indang shia lir.

Afghanistan indang Refugee Ministry otongdar Abdul Mutalib Haqqani-i Associated Press dang ashiba agi, Pakistan-i U.N. refugee agency mesüra Taliban sorkar den kecha sensak mesemi telemtetba agidar.

"Onoki parnok den onok tebilemtsü lemsatepogo aser telok kati dang telemtetba agir refugee tem mintokba ya parnok mesüra onok tejangraba masü. Iba ya parnok tejangraba nung masü, kechiyong yamai parnok mintokba ajanga Pakistan sempadaktsür, ta Haqqani-i ashi.

"Onok atemabo Afghan nunger aika meyipa aruba achaayangtsü ya timtem lir. Onoki parnok ya tangatettep nung meyipa yoksüla ta shiogo, ajita asünungdang parnok meraket mesamai meyipa arutettsü."

Afghanistan-i meyipa yokertem nem teyari agütsütsü atema Khyber Pakhtunkhwa province nung transit station ana amenoktsü. Ka Peshawar suburbs nung Nasir Bagh nung amenoktsü aser tanabuba ya arrtsü nung aliba jila Landi Kotal nung amenoktsü, koba Torkham crossing nungi km 7 shi pilar lir.

Afghanistan nunger kibong nung asoba tanurtem, tanga kuli kaket bena aliba Afghan nunger apuanitem aser tsürapur ana rongnung ka Pakistan aser ka Afghanistan nunger asürtem dak kechi ataloktsü aji mejangja. Ajsüaka ketdangsürtemi ashiba agi, iba amala ken o nung social welfare staff temi teyari agütsütsü.

Omaid Khan-i Afghan Citizen Card bena lir aser pa kinungtsüi Registration kuli bena lir. Pakistan sorkar policy dak ajemdaker pa linük toktsür aotsüla saka pa kinungtsübo June 30 nü tashi litettsü. Par tanur ana ket nung passports mesüra identity card densema kecha kuli kaket mali.

"Ni Paktia province nungi lir, saka ni iba tesemi kodanga modang aser kü tarutsü mejangja," ta pai ashi.

Mongsenbai aser Dilong na semifinal-i iogo



6th Mokokchung Inter-Ward Football Tournament mezüngbuba Quarter Final asaya Mongsenbai Ward aser Majakong Ward tsünga asayadang tangokba noksa.

Mokokchung, Metsüremi/March 31 (TYO):

Imkongmeren Sports Complex Mokokchung nung tanü 6th Mokokchung Inter-Ward Football Tournament mezüngbuba Quarter Final asaya kanga dang takok ngua asaya-a tembangogo.

Tanü mezüngbuba Quarter Final asaya Mongsenbai Ward aser Majakong Ward tsünga asaya, tanü iba asaya nung Mongsenbai telok nungi jersey no-17 asemsang Tiatoshi-i

asaya tenzüker minute 21 buba nung goal-1 idaktsü aser iba goal kija jagi Mongsenbai Ward-i Majakong Ward kokteta Semi Final asayatsü maongka ajangzüktetogo.

Tongdentsüyong Ward aser Dilong Ward tsünga tanabuba Quarter Final asayaba nung telok katia goal magütsüteti asaya tembang. Tena asaya aruba asadanger tena rongnungi Dilong Ward Semi Final asayatsü mangaka nguogo.

Tanü mezüngbuba Quarter Final akoker Mongsenbai Ward den Dilong Ward 02-04-2025 nü nikongdang 2:00 ako nungi Mezüngbuba Semi Final asayatsü.

01-03-2025 Quarter Final Fixture

Mezüng asaya - 1:00 PM
- Sangtemla Ward Vs Artang Ward
Tanabuba asaya - 2:45 PM
- Sungkomen Ward Vs Kumlong Ward

Arsenal & Tottenham na tang mezüngbuba UK adena or asayatsü

Metsüremi/March 31, 2025 (Agencies): Arsenal aser Tottenham na tang mezüngbuba UK adena or north London derby asayatsü lir. Team ana ya taküm lemluwa Hong Kong nung oa pre-season friendly asayatsü lir.

London nung amendaker aliba club ana ya 2025-26 season atema renemshiba nung shilem ka ama tawa lapokba Kai Tak Stadium nung nung July 31 nü asayatsü.

Asaya koba 7:30pm local time (11:30am BST) nung asayatsü atema renema lir, iba ya team ana tsünga UK adena or asayaba mezüngbuba asaya asütsü.

Iba fixture ya Hong Kong Football Festival nung shilem ka lir, kong Premier League club Liverpool aser AC Milan na July 26 nü asayaba angutsü.

Arsenal pur tatemsa 2012 küm Hong Kong nung asayaogo aser Spurs pur 2024 küm Japan aser South Korea nung oa asaya liasü.

Manchester United pura Hong Kong aser Malaysia nung oa post-season friendlies ana asayatsü lir, saka parnok ya pre-season terenemshiba nung shilem ka ama United States

nung oa asayatsü aliba Premier League club tem rongnung ka lir.

Pre-season atema Chelsea aser Manchester City napronglai telemtetba magi lir, kechiyong club anaprongla ya Club World Cup asayatsü, koba June 15 nü tenzüksü.

Kasa mapang nung Arsenal nungi asayar Bukayo Saka yiruba ajanga ita asem masayateti lir asayatsü temsüa kümogo, ta manager Mikel Arteta-i ashi.

England nung international asayar ya December 21 nü Premier League nung Crystal Palace akokba asaya nung hamstring yiruba sülen surgery agia liasü.

Saka, shibai tang asaya aliba season nung asayamung ajak senteper asaya 24 nung goal teku agütsüba den assist 10 süja lir, pa Mongolbarnü league nung Fulham den asaya nung asayatsü akok.

"Bukayo Saka asayatsü renema lir," ta Arteta-i ashi.

Arsenal pur tang Premier League nung asaya teku asayatsü anunga lia Liverpool sülen tanabuba jenjang nung lir. Parnoki point 12 agi Liverpool memenepe lir.

Jakub Mensik-i Miami Open final nung Djokovic akok



Metsüremi/March 31, 2025 (Agencies):

Czech nung lanur asayar Jakub Mensik-i Deobarnü Hard Rock Stadium nung Miami Open tebur kija asaya final nung Novak Djokovic 7-6 (7/4), 7-6 (7/4) agi kokogo.

Arishi küm 19 tain asayar shiba tang world rankings nung jenjang 54buba nung lir, pai ATP Tour nung tang mezüngbuba title ka benogo aser Djokovic-i pa indang career nung asayamung 100buba akoktsü aliba nokdangogo.

Mensik tang agi tanebenbuba-ang ATP final nung asaya liasü, saka pai pa tashi kanga junga amshia ace 14 oa Grand Slam 24 koker aliba asayar ya koka liasü.

Jimmy Connors (109) aser Roger Federer (103) na sülen Open Era nung asayamung 100 akokba tasembuba asayar akümtsü asoshi arishi küm 37 tain Djokovic timla liasü, saka pai Mensik indang speed aser kanga sangra asayaba den meneptepa masayatet.

Mensik-i asaya kanga tashi

ita tenzüker aser Djokovic indang mezüngbuba service game break süa pa 2-0 agi tejakdang aküm, ajisüaka 4-2 aliba mapang Djokovic-i Mensik indang serve break süa liasü.

Iba sülen tenapronglai pei service break mesüdaktsüi asaya atu, saka tie-break nung Mensik-i service kanga ajanga ao aser ace ana tashi oa pa 5-0 agi tejakdang aküm aser Djokovic-ia point pezübo angu saka Mensik-i asaya kokatok.

Iba set makokba ya Djokovic atema iba asayamung nung mezüngbuba set nung tamakok anguba aliasü.

Tanabuba set nung asayar anapronglai serve ka danga break mesüteti asaya. Iba sülen tie-break asayaba mapang Mensik-i service kanga ajanga aoba ajanga pa nem maongka tali agüja pai asaya akok.

Deobarnü Hard Rock Stadium nung tebur final asaya ya tzünglu aruba ajanga ghonda pongu ser tesadang menor tenzüker.

Tetsür tarep final asaya Mirra Andreeva aser Diana Shnaider na Cristina Bucsa aser Miyu Kato na den asayaba mapang tzünglu aru tenzüker. Iba mapang tashi nung Andreeva aser Shnaider ba 3-0 agi tejakdang liasü.

Tetsür tarep asaya final ya Andreeva aser Shnaider nati 6-3, 6-7 (5), 10-2 agi koka liasü.

IPL 2025: RR captain Parag dang senchi achi

Metsüremi/March 31, 2025 (Agencies):

Rajasthan Royals' indang stand-in captain Riyan Parag dang Board of Control for Cricket in India (BCCI)-i senchi sen lakh 12 chiogo. Deobarnü Barsapara Stadium nung Chennai Super Kings den asayaba mapang atakzükja aliba mapang dang nungi mapang tali agia asayaba atema pa dang senchi chia liasü.

Sunrisers Hyderabad aser Kolkata Knight Riders na makokba sülen IPL 2025 nung mezüngbuba asaya akokba sülen senchi ya chia liasü.

IPL Code of Conduct kübok Article 2.22 dak ajemdaker iba temerenshi ya agütsüogo, koba minimum over-rate aibelen dak sendaka lir. Iba ya team atema tang asaya aliba season nung mezüngbuba aibelen asünung Parag dang senchi dang chiogo.

Mumbai Indians captain Hardik Pandya dang senchi achiba sülen Prag ya taküm senchi achiba captain tanabuba kümogo. Pandya ya Honibarnü Ahmedabad nung Gujarat Titans pur makokba asaya nung aibelenba atema merenshiogo.

Over-rate aibelen dak sendakba nung BCCI-i temzüng ozüng tasen ka benokogo. Captain tem asaya atema tenokdangba magütsütsü saka aibelen



jenjang apir captain tem nem demerit points agütsütsü. 2024 nung aibelenba atema Hardik nem asaya ka atema tenokdangba agüja pa Mumbai pur 2025 küm mezüngbuba asaya Chennai Super Kings den asaya nung shilem magitetba sülen iba ozüng ya melenshiogo.

CSK den asayaba mapang Rajasthan Royals puri kanga dang tongtibang takok ka ngutetogo. Asaya nung Sri Lanka nung spinner Wanindu Hasaranga-i tongtibang shilem agia run 35 agütsür wicket 4 agi aser Chennai team nungi asayartemi spin junga masayatetba jungkai adoka sayuogo.

Nitish Rana-i half-century

ka yanglua Rajasthan puri run telong junga yangluba nung teyari agütsü. Asaya ya tatem tashi kanga toktepa asaya aser tatembangbuba over nung Sandeep Sharma-i run 20 kanga junga nokdangtet aser MS Dohni indang wicket agia liasü.

Asaya ana atonga makokba sülen Rajasthan puri mezüngbuba asaya kokogo. Mezüngbuba asaya nung parnoki Sunrisers Hyderabad makok aser tanabuba asaya nung Kolkata Knight Riders pur makok.

Rajasthan Royals pur taruba asaya Punjab Kings den Maharaja Yadavindra Singh Cricket Stadium, Chandigarh nung asayatsü.

BILEMDANGANG

"Tamang makatetba agi pungmangtem mokseper."